

Buobas dalla Cadi sin parchet naziunal

Per l'emprema ga ei in'uniun dil Grischun separticipada ad ina concorrenza naziunala dalla gimnastica d'acrobatica. Dall'Uniun da gimnastica Cadi ein numnadamein sis mattatschas sepresentadas a Wiesendangen alla giuria ed al publicum. Leu ha giu liug ina concorrenza naziunala dall'Uniun da sport Svizra. Schegie che las duas gruppas dalla Cadi ein stadas senza concorrenza directa, han ellas tonaton saviu guder l'atmosfera da campiunadi e rimnar novas experientschas. (fmr/hh)

Pagina 4



Las mattatschas dall'Uniun da gimnastica Cadi a lur emprema concorrenza d'acrobatica sin plaun naziunal.

FOTOS MAD

L'acrobatica ha fitgau pei ella Cadi

Sis mattatschas dall'Uniun da gymnastica Cadi ein separticipadas la fin dall'jamna vargada ad ina concorrenza dalla gymnastica d'acrobatica a Wiesendangen. Igl ei stau l'emprema ga ch'ina gruppa dil Grischun ei semesirada en quella disciplina ad in arranschament dall'Uniun da sport Svizra.

HANS HUONDER/FMR

Dacuort ein l'organisaziun dils Movis e l'Uniun da gymnastica Mustér s'unidas sut in tetg: l'Uniun da gymnastica Cadi. Ussa sa quella gia festivar in emprem bi success, numnadamein la participaziun alla concorrenza dalla gymnastica d'acrobatica dall'Uniun da sport Svizra la fin dall'jamna vargada a Wiesendangen. A quella concorrenza ch'ei vegnida organisada parallelmein cul campiunadi cantunal da Turitg ein 205 atletas ed atlets dall'entira Svizra separticipai. L'Uniun da gymnastica Cadi cun dus teams da mattatschas ei stada l'emprema uniun da gymnastica dil Grischun ch'ei insumma separticipada ina ga ad in tal campiunadi. Da quei eis ei vegniu fatg specialmein menziun a Wiesendangen: «Igl ei bi da veser co la scena dalla gymnastica d'acrobatica en Svizra crescha.» L'Uniun da sport Svizra ei in'associaziun dil sport popular. Ella dumbra 35 000 commembras e commembers da rodund 200 uniuns polisportivas cul focus sin gymnastica e sport. Ella s'auda denter las 20 pli grondas uniuns da sport dalla Svizra. Dapi 80 onns eis ella sut il tetg da «Swiss Olympic». 2019 ha ella saviu festivar il giubileum da 100 onns.



Fuffergnau vid il success.

FOTO MAD

Entschatta reussida

Al campiunadi dall'Uniun da sport Svizra ein atletas ed atlets dils cantuns Turitg, Tessin, S. Gagl, Geneva, Neuchâtel e Grischun separticipai. In eveniment special eis el staus per la gruppa dallas sis mattatschas dalla Cadi ch'ei separticipadas sco team alla gymnastica d'acrobatica. «Igl ei stau in grond eveniment per nos affons da saver concorrenzar el medem liug sco ils profis», di la trenadra *Anja Klittich Berther* ch'ei da professiun pedagoga da sport diplomada. Tutt'entschatta seigi stada greva, mo el dequors dil di da concorrenza seigi ei reussiu allas mattatschas da s'acclimatisar: «Per la fin dil di han ellas saviu presentar lur exerchezis alla gronda giuria cun diesch personas ed al publicum. Ellas han fatg quei suveran, han empiru bia quei di e gudiu la concorrenza ensemen cun lur trenaders.»

Loschs sil team

«Nus essan fetg loschs silla prestaziun da nies team. Jeu selegrel fetg che nus havein gia contonschiu in emprem success cun nosa nov'uniun», di *Anja Klittich Berther*. Las du-

Tgei ei gymnastica d'acrobatica?

Gymnastica als urdeins e sport d'acrobatica han differentas parallelas, surtut pertucont tensiun dil tgierp, coordinaziun dils moviments, il sentiment dalla ballontscha ni era la movibladad. Ils atlets dil sport d'acrobatica nezegian persuerter negins urdeins. Per contonscher lur finamir – per exempel da siglir ad ault – senezegian els dall'atgna forza e da quella dils partenaris. Tier la gymnastica dall'acrobatica s'audan per exempel saltos, cupitgolas, segls cumplicai ni era figuras staticas sco piramidas da carstgauns. All'acrobatica san ins attribuir mintga prestaziun e sport ch'involva igl entir tgierp, surtut enten far moviments cuorts e controllai.

as gruppas han contonschiu igl emprem e secund plaz en lur categoria: «Ellas ein stadas senza concorrenza en quella categoria, mo per la motivaziun dils affons eis ei stau il meglier ch'els han astgau ascender il podest era aschia.» Ella seigi sesentida empau sco lezza ga igl onn 1988 cura che l'equipa da bob da Jamaica seigi separticipada els Giugs olimpics da Calgary. Special plascher ha la trenadra dil retscheviment a Wiesendangen: «Igl ei vegniu

puntuau pliras ga che nus seigien igl emprem team dil Grischun ad ina concorrenza d'acrobatica.» Las mattatschas hagian saviu rimnar experientschas ad in'emprema concorrenza e viu tgei ch'ei munta far gymnastica d'acrobatica, mo era da trenar fetg persuerter. La presidenta dall'Uniun da gymnastica Cadi, *Helga Probst* e las famiglias dils affons ein medemmein serendi a Wiesendangen per sustener leu las mattatschas.